

ՎԱՀԱՆ ՄԱՄԻԿՈՆԵԱՆԻ ՕՐՕՔ ԷԶՄԻԱԾՆԻ ՄԱՅՐ ՏԱԾԱՐԻ  
ՎԵՐԱԿԱՌՈՒՑՄԱՆ ԹՈՒԱԿԱՆԻ ԾՈՒՐՋ

Նագենի Ղարիբեան

Էջմիածնի մայր տաճարի կամ, ըստ ժամանակագրական առաւել ճշգրիտ առնուանման՝ Վաղարշապատի Կաթողիկէի վերակառուցումը՝ Վահան Մամիկոնեանի կողմից հինգերորդ դարի վերջին՝ այս կարեւորագոյն յուշարձանին վերաբերող սակաւաթիւ տեղեկութիւնների ու փաստերի շարքում ամենայայտնիներից ու վստահելիներից է<sup>1</sup>: Դրանով հանդերձ, այս եղելութիւնը բազմաթիւ հարցեր ու խնդիրներ է առաջ բերել եւ մեծ բանավէճերի առիթ է հանդիսացել արուեստի պատմութեան, հնագիտութեան եւ բանասիրութեան ոլորտներում, մասնաւորապէս՝ վերակառուցման արդիւնքում շէնքի յատակագծի եւ ճարտարապետական տիպի փոփոխութեան վերաբերեալ<sup>2</sup>: Դրանցից ամենակարեւորներին մենք հանգամանօրէն անդրադարձել ենք տաճարի նախնական տեսքին վերաբերող ծաւալուն յօդուածում եւ մեր ղոկտորական թեզում<sup>3</sup> փորձելով բոլոր տուեալների համադրութեան օգնութեամբ ղուրս բերել հնարաւորինս ճշգրիտ, առաւել փաստարկուած պատասխաններ եւ գտնել տրամաբանական, հակասութիւններից զերծ լուծումներ: Այդուհանդերձ, թե-

ման դեռեւս հեռու է սպառուած համարուելուց:

Կաթողիկէի վերանորոգմանը վերաբերող հարցերի համալիրում կայ եւս մէկը, որին կը ցանկանայինք անդրադառնալ սոյն շարադրանքում. դա աշխատանքների սկսման թուականն է: Ըստ մասնագէտների մեծ մասի՝ այն տեղաւորում է 484-490 թթ. միջեւ՝ որպէս ժամանակագրական սահմաններ ընդունելով ապստամբութեան աւարտը եւ Նուարսակի հաշտութեան պայմանագիրը Վահանի ու Նիխոր Վշնասպաղատի միջեւ եւ Յովհաննէս Մանդակունու մահը<sup>4</sup>: Ամենահաւանական թուականն ընդունուել է 485-ը<sup>5</sup>, որի ընտրութիւնը յենուում է իրար յաջորդող երկու փաստական հետեւութիւնների վրայ, ըստ որոնց Վահան Մամիկոնեանը վերակառուցման աշխատանքները պէտք է սկսած լինէր միայն մարզպան նշանակուելուց յետոյ<sup>6</sup>, իսկ այդ նշանակումը տեղի է ունեցել Վահանի՝ Տիգրան մեկնելուց եւ Մամիկոնեան տանուտիրոջ ու սպարապետի տիրոջը վերանուաճելուց մէկ տարի անց, որն էլ, ընդհանուր առմամբ, համարուում է

1 Յուշարձանի մասին IV-XV դդ. պատմական տեղեկութիւնների թուարկումը եւ համառոտ վերլուծութիւնը տե՛ս N. Garibian de Vartavan, *L'aspect primitif de l'Eglise-mère Etchmiacine*, REArm, 29 (2003-2004), էջ 403-501, մասնաւորապէս՝ 404-408.  
2 Տարբեր վարկածների եւ տեսակետների մանրագնի քննութիւնը տե՛ս *Առաջ*, էջ 409-432:  
3 *Նոյնը*. թեզը՝ Art et théologie en Arménie du IV au VII s: étude de l'église comme temple chrétien, Paris, EPHE 2005; մաս IV, էջ 288-356:

4 Մ. Օրմանեան, *Ազգայապատմ.*, Կոնստանդնուպոլիս, I մաս, § 320-321  
5 Ա. Սահիմեան, *Նոր միջեր էջմիածնի Մայր տաճարի կառուցումի վերաբերեալ*, - «Էջմիածին», 1956, Ը-թ, էջ 60-69; P. Donabédian, *Les premiers édifices chrétiens d'Arménie*, - Armenia sacra, catalogue de l'exposition du Louvre, Paris 2007, p. 48-59, յատկ. 57  
6 Ստ. Մալխասեանց, *Ղազար Փարպեցու հրատարակութեան առաջաբան*, Թիֆլիս, 1904, էջ Ա. Բ. Ուլուքաբեան, *Ղազար Փարպեցի*, հրատ. Թուրք առ Վահան Մամիկոնեան, ծնթ. 26, էջ 518

485 թ.<sup>7</sup>: Սակայն կան նաեւ կարծիքներ, ըստ որոնց վերանորոգումը կատարուել է մինչեւ ապստամբութեան աւարտը<sup>8</sup> կամ մինչեւ մարզպան նշանակուելը<sup>9</sup>: Տարա-

կարծութեան պատճառը վերանորոգման մասին յիշատակող աղբիւրների տեղեկատուական անորոշութիւնն է:

Ամենաարժանահաւատ աղբիւրը իրադարձութեան ժամանակակից եւ ականատես<sup>10</sup> Ղազար Փարպեցին է: Վերանորոգման բուն յիշատակութիւնը գտնուում ենք նրա Հայոց պատմութեան մէջ. «Եւ եկեալ հասանէր այնուհետեւ ի Վաղարշապատ քաղաք հանդերձ ողջախորհուրդ եւ աննենգ ուխտապահ նախարարաւքն Հայոց. կատարէր զսովորական ուխտս եւ զպատարագս ի սուրբ եկեղեցւոյն կաթողիկէի, զոր հիմնարկեալ նորոգեաց մեծապայծառ շքեղութեամբ զհնացեալ գործ նախնեացն իւրոց, քաջ զաւրավարն Հայոց Մամիկոնեանն Վահան»<sup>11</sup>:

Ըստ պատմիչի խօսքի յաջորդականութեան՝ Վահանը գնում է Վաղարշապատ Պերողի մահուան եւ Հայոց աշխարհից պարսից զօրքի հապշտապ ետ վերադառնալու լուրն ստանալուց յետոյ, որտեղից էլ մեկնում է Դուլին եւ դադար առնում՝ սպասելով «հրամանի առաջնորդութեանն Բրիստոսի»:

Յաջորդը Սեբէոսի Պատմութիւնն է, որտեղ Վահանի վերակառուցման յիշատակութիւնը նախորդում է Հեփթաղների դէմ Պերողի արշաւանքի եւ նրա մահուան տեղեկութեանը. «Այս Վահան ժողովեաց եւ զհարկս աշխարհին Հայոց եւ շինեաց եկեղեցիս մեծամեծս, զոր աւերեալ էր Պարսից ի Վաղարշապատ քաղաք եւ ի Դուլի եւ ի

7 Մ. Օրմանեան, *Ազգայապատմ.*, § 316-317, 320. Ստ. Մալխասեանց, *Առաջաբան*, էջ Ա. եւ Բ. Վ. Իսկանեան, *Մարզպանական Հայաստանի ապստամբութիւնը Պարսկաստանի դէմ եւ Բիզանդիան* (Ե դ. վերջ եւ Ջ դ. սկիզբ), ՊԲՀ, 1969/1, էջ 29-42. K. Youzbaşyan, *L'amertume de Lazar P'arpec'i, From Byzantium to Iran: In Honour of Nina Garsoian*, Atlanta 1996, p. 325-340:  
8 Մ. Չամչեան, *Պատմութիւն Հայոց*, հտ. II, Վեներիկ-Ս. Ղազար, 1785, էջ 195: Չամչեանը ժամանակագրորէն բաժանում է Կաթողիկէի վերանորոգութիւնը եւ Սուրենեաց անապատի նորոգութիւնը, որ նա տեղադրում է Դերշան գաւառում: Վերջինը, սակայն, թուագրում է Վահանի մարզպան դրոնաւուց յետոյ՝ 485 թ. (նոյնը, էջ 217). P. Pamboudjian, *La cathédrale d'Etchmiadzin à la lumière des découvertes récentes*, - in: J. Mécérian, *Histoire et institution de l'Eglise arménienne*, Beyrouth 1965, pp. 347-380:  
9 Մ. Օրմանեան, *Ազգայապատմ.*, § 321. Կ. Տէր-Մկրտչեան, *Հայոց Եկեղեցու պատմութիւն*, Վաղարշապատ-Ս. Էջմիածին, 1908, էջ 179-81: Ըստ Քեղիմակի՝ Վահանը կարող էր նման որոշում կայացնել՝ որպէս Մամիկոնեան տանուտէր, քանի որ Վաղարշապատի սրբավայրերը գտնուում էին իր հողային տիրոջներում: Տէր-Մկրտչեան, այսպիսով, վերակառուցման թուականը համարում է 487-ը, իսկ Վահանի՝ մարզպան նշանակուելու տարին՝ 488-ը: Սակայն այլ աղբիւրներ գտնում են, որ նա միեւնոյն ժամանակ եկեղեցիներ է վերակառուցել նաեւ մայրաքաղաք Դուլիում եւ ընդհանրապէս Հայաստանի քաղաք այլ վայրերում (լղումների համար տե՛ս ստորեւ): Խաչատրեանը (A. Khatchatrian, *L'Architecture arménienne du IV au VI s.*, Paris, 1971, p. 87), հիմնուելով հաւանաբար Փարպեցու պարբերութեան վրայ, գտնում է, որ Վահանը Կաթողիկէն վերակառուցել է մինչեւ Նուարսակի պայմանագիրը, երբ յաղթական ճակատամարտից յետոյ գալիս է Վաղարշապատ 484 թ., իսկ յաջորդ՝ 485 թ. նշանակում է մարզպան: Վերակառուցումը, առանց որոշակի փաստարկների, Վահանի մարզպանութիւնից առաջ, բայց Նուարսակի պայմանագրից յետոյ է տեղադրում Ղազարեանը՝ նույնպէս թուագրելով 484 տարով, A. Казарян, *Кафедральный*

собор Сурб Эчмиадзин и восточнохрис-тианское водчество IV-VII веков, М., 2007, ст. 15.  
10 Դատելով տեղ գտած մի քանի ակնարկներից, որոնք կը քննարկենք ստորեւ՝ Կ. Տէր-Մկրտչեանի կարծիքով, վերակառուցման աշխատանքներն ընթացել են Փարպեցու հսկողութեամբ. տե՛ս *Առ. աշխ.*, էջ 179:  
11 Ղ. Փարպեցի, *Պատմութիւն*, § 86

Մզրայս եւ բազում տեղիս աշխարհին Հայոց»<sup>12</sup>:

Ժամանակագրական նոյն յաջորդականութիւնը տալիս է նաեւ Դրասխանակերտցին. «...եւ ժողովեալ զՀարկ աշխարհիս՝ շինէ այնուիկ զեկեղեցիս զաւերեալս ի թշնամեաց՝ թելադրութեամբ եւ խրատու եւ աղօթից նպաստիւ սուրբ Հայրապետին Յովհաննու Մանգակունւոյ»<sup>13</sup>:

Ասողիկը Վահանի շինարարական գործունէութիւնը նկարագրում է նրա մարզպանութեան մասին յիշատակելուց յետոյ. «Իսկ Վահան եկեղեցիս Աստուծոյ լուսազարդեալ նորոգէր զպաշտօնեայս ուխտին մեծարելով՝ բարեշէն զաշխարհս ունելով: Նոյնն եւ ի ժամանակս իշխանութեան իւրոյ զմեծ կաթողիկէ եկեղեցին, որ ի Հայս վերստին մեծապէս նորոգեաց...»<sup>14</sup>: Սակայն պատմիչի շարադրանքի բնոյթից դժուար է ժամանակագրական յստակ եւ յուսալի յաջորդականութիւն սահմանել: «Ի ժամանակս իշխանութեան իւրոյ» արտայայտութիւնից կարելի է միայն ենթադրել, որ վերանորոգութիւնը տեղի է ունեցել Վահանի մարզպան դառնալուց յետոյ:

Փորձենք կրկին քննութեան առնել այս իրադարձութեանն առնչուող փաստերը, տեղեկութիւններն ու եզրակացութիւնները:

Թէեւ Փարպեցու մօտ վերակառուցման մասին տեղեկութիւնը զետեղուած է Նուարսակի Հաշտութիւնից առաջ, այնուամենայնիւ, կարծում ենք, որ ժամանակագրական առումով այն իր տեղում է:<sup>15</sup> Նախ՝ «կատարէր զսովորական

ուխտս եւ զպատարագս» չի համապատասխանում՝ որեւէ եկեղեցու հիմնարկեքի արարողութեանը, մանաւանդ որ դրանից յետոյ Վահանն իր շքախմբով այցելում է նաեւ Վաղարշապատի միւս վկայարանները, որտեղ եւս որոշ սովորական արարողութիւններից եւ աղքատների կարիքները հոգալուց յետոյ սովորական խնջոյքի է նստում: Վահանի այս սովորոյթը Վաղարշապատում Փարպեցին նշում է եւս երկու անգամ՝ գրեթէ նոյն արտայայտութիւններով<sup>16</sup>: Ապա՝ նմանատիպ շինարարութեան համար նիւթական մեծ ծախսեր են հարկաւոր, որ հազիւ թէ Վահանը կարողանար այդ պահին տրամադրել: Ծիշտ է, միւս աղբիւրների համաձայն՝ եկեղեցիների վերանորոգումից առաջ Վահանը հաւաքել էր «զհարկս աշխարհին Հայոց», սակայն եթէ նոյնիսկ ենթադրենք, որ հարկահաւաքութիւնն իրականացուել էր պատմաբանութեան տարիներին, ռազմական գործողութիւնների մէջ գտնուող Վահանը հազիւ թէ հրաման տար նորոգել ոչ միայն տաճարը, այլեւ միւս քանդուած եկեղեցիները: Նրա եւ իր համախոհների առաջնահերթ մտահոգութիւնն այդ պահին ոչ թէ շինարարական գործունէութիւնը, այլ երկրի եւ իրենց հետագայ ճակատագիրն ու ռազմական եւ քաղաքական բնոյթի իրադարձութիւնները պէտք է լինէին: Փարպեցին ինքն էլ նշում է, որ նրանք վերադարձան Դուին՝ սպասելու, թէ ինչպէս են զարգանալու իրադարձութիւնները: Վերջինները երկար սպասել չեն տալիս: Պարսկական աւագանին Պերոզի փոխարէն շահնշահ է ընտրում նրա եղբայր Վաղարշին, որը, հեզաբարոյ, աշխարհաշէն եւ իմաստուն այր լինելուց զատ, նախեւառաջ պարտաւորութիւն ունէր վերականգնելու սասանուած կայսրութեան հզօրութիւնը<sup>17</sup>:

16 Տե՛ս Մ. Օրմանեան, Ազգապատում, § 77 եւ 97:  
17 Պերոզի պարտութիւնից յետոյ Հեփթաղները ներխուժել էին իրանական կայսրութիւն, գրաւել

12 Սեբեոս, գլ. Ը 15, քննական հրատ., Մատենագիրք Հայոց, Դ հտ., Անթիլիաս-Լիբանան, 2005  
13 Աշխարհաբար թարգմ. եւ ծմբ. Գ. Թոսուցեանի, ԵՊՀ հրատ., 1996, էջ 64:  
14 Տիեզերական պատմութիւն (III. 2), հրատ. Կ. Օսմանապետեան, Փարիզ, 1859, էջ 82  
15 Տե՛ս Մ. Օրմանեան, Ազգապատում, § 321:

եւ խաղաղութեամբ ու քաղցրաբանութեամբ հնազանդեցնել պատամբ անարիներին, որոնցից առաջինների թւում եւ Հայոց աշխարհը<sup>18</sup>: Այդ պատճառով նա շուտափոյթ Նիխորին դեսպան է ուղարկում Հայաստան, որպէսզի վերջինս համաձայնութեան գայ Վահանի հետ, անգամ նրա եւ նրա համախոհների առաջադրած պայմաններն ընդունելու գնով, եւ նրանց կրկին «նուաճեալ յԱրեաց ի ծառայութիւն»<sup>19</sup> բերի:

Բացի այդ, Ղազար Փարպեցու՝ Վահան Մամիկոնեանին հասցէագրած Թղթի առաջաբանում, որ գրել է հաւանաբար նրա ժամանակակից եւ նրան լաւ ճանաչող մէկը<sup>20</sup>, յստակ նշուած է, որ Վահանը Վաղարշապատի կաթողիկէի եւ կից վանքի հոգաբարձութիւնը Ղազարին է յանձնել մարզպան դառնալուց յետոյ. «Կամեցեալ մեծի իմաստութեանն Վահանայ մարզպանին, զաւրավարին Հայոց տեառն Մամիկոնէից... շնորհէր նմա զհոյակապ եւ զակաւաւոր տեղին ի Նոր Քաղաքի, որում անունն էր սուրբ Կաթողիկէ եկեղեցի, վանաւքն»<sup>21</sup>: Միւս կողմից՝ բուն նամակից պարզ է դառնում, որ Փարպեցին ներկայ է եղել վերանորոգման աշխատանքներին հէնց սկզբի օրուանից, քանի որ պատմում է, թէ ոմն Ակիթ Գարդմանացի մասնակցել

տարբեր պրովիցիաներ եւ քաղաքներ եւ տարեկան հարկի տակ դրել պարսիկներին. A. Christensen, L'Iran sous les Sassanides, Paris-Copenhague, 1936, էջ 289, 295-96: Բացի պատերազմի վնասներից, Պերոզի օրօք անել սաստիկ երաշտի հետեւանքով երկարատեւ սով է եղել, որ շարունակուել է Առնիսկ Արա մահուանից յետոյ՝ 485 թ. տե՛ս Առնը, էջ 285-286:

18 Փարպեցի, Պատմութիւն, § 87  
19 Նոյնը, § 88  
20 Մ. Նալբանդեան, Ղազար Փարպեցու գրած Թողթը. Մեղադրութիւն ստախոս արեղաների, թարգմ. եւ ծմբ., Ս. Պետերբուրգ, 1868, ծմբ. 2. Youzbasian, L'amertume...  
21 Քննական հրատ., § 7, Մատենագիրք Հայոց, Բ հտ., Անթիլիաս-Լիբանան, 2003: Նոյն կարծիքն է նաեւ Թոմսոնը. Աշ. աշխ., էջ 6:

է հիմնարկեքի արարողութեանը. «...այր մի Ակիթ անուն, որ եկեալ ի տեղիդ ի Գարդմանայ վանաց ի նմին աւուր, յորում հիմն արկեալ տեղուոյդ, եւ մինչեւ ցգնալն իմ ի տեղուոյդ էր...»<sup>22</sup>: Որից էլ կարելի է եզրակացնել, որ նա հոգաբարձու է նշանակուել ոչ թէ վերանորոգումից յետոյ, այլ առաջ կամ միեւնոյն ժամանակ եւ դեկավարել է աշխատանքները<sup>23</sup>:

Պերոզի մահը վրայ է հասել 484 թ. ամռանից ոչ շուտ<sup>24</sup>, քանի որ Մծբինի եպիսկոպոս Բարշաուման նրա հրամանով ժողով է գումարել նոյն թուականի ապրիլին, իսկ «քիչ ժամանակ անց» Պերոզը մահուան է դատապարտել կաթողիկոս Բարսեղի վանքին<sup>25</sup>: Իսկ Վաղարշի թագադրութիւնը հաւանաբար տեղի է ունեցել նոյն թուականի ամռան վերջին կամ աշնանը, չնայած նրա գահակալութեան սկիզբը, ըստ իրանական տոմարային աւանդութեան, համարում է 484-ի յուլիսի 23-ը<sup>26</sup>: Ըստ այդմ՝ Նուարսակի պայմանագիրը պէտք է տեղաւորել ոչ շուտ, քան 484 թ աշնանը:

22 Քննական հրատ., § 104, Մատենագիրք Հայոց, Բ հտ., Անթիլիաս-Լիբանան, 2003: Ենթադրութիւնը, թէ խօսքը գնում է ոչ թէ տաճարի, այլ կից վանքի վերանորոգման մասին (տե՛ս Նալբանդեան, Աշ. աշխ., ծմբ. 6. Մալխասեան, Աշ. աշխ., էջ Ա. Ուլուրաբեան, Աշ. աշխ., էջ 518, ծմբ. 26. etc Khatchatrian, L'Architecture arménienne, էջ 87 եւ յետոյ) քննարկ է եւ չունի ոչ մի փաստական հիմնատրուս: Այս հարցին մենք հաճախում ենք անդրադարձել եւս կաթողիկէին նուիրուած վերոնշեալ յօդուածում:  
23 Նոյն կարծիքն է նաեւ Տեր-Մկրտչեանը. Աշ. աշխ., էջ 179:  
24 Եւ ոչ Առն տարուայ սկզբին, ինչպէս տարածուած է հայագիտութեան մէջ. տե՛ս Կ. Իւզբաշեան, Երբ է սկսուել...  
25 Synodicon Orientale, Recueil des synodes nestoriens, Ed. du texte syriaque et trad. française, introd. et notes par J. B. Chabot, Notices et extraits des manuscrits de la Bibliothèque Nationale et autres bibliothèques, T. 37, Paris, 1902, էջ 308, ծմբ. 1. դիպումս մասին տե՛ս նաեւ՝ Christensen, Աշ. աշխ., էջ 287:  
26 Կ. Իւզբաշեան, Երբ է սկսուել...

Փարպեցին նշում է, որ Նիխորին հրաժեշտ տալուց յետոյ Վահանը վերադառնում է Դուին եւ Արտաշատի (այսինքն՝ Տափերի) կամուրջը քանդուած է գտնուած, մինչդեռ գետը «սաստկապէս ըստ ժամանակի իւրոյ պղտորութեանն» էր<sup>27</sup>: Գետը, աւելի հաւանական է, կարող է վարարել աշնան անձրեւներից կամ գարնան ձնհալքից, ուրեմն եւ Նուարսակի պայմանագիրը կարելի է թուագրել 484-ի աշնանով կամ 485-ի գարնանով<sup>28</sup>: Բացի այդ, Փարպեցին պատմում է նաեւ, որ մինչեւ Վահանի ճամփորդութիւնը Տիզբոն Նիխորը նրանից խնդրում է Հայոց այրուծին, Պերոզի որդի՝ Ջարեհի խոռովութեանը դիմազրաւելուն օգնելու համար<sup>29</sup>: Եւ միայն միջադէպի յաղթական աւարտից յետոյ է Վահանը ճանապարհուած Վաղարշի արքունիք: Այսպիսով, Վահանի Աուաճուելու, այդու՛ սպարապետի ու Մամիկոնեան տանուտիրոջ ընտանեկան աւանդական պատիւը ետ ստանալու եւ Հայաստան վերադարձի հաւանական ամենավաղ ժամկէտը կը լինի 484 թ. վերջը կամ 485-ի գարունը<sup>30</sup>: ամենաուշը՝ վերջին թուականի ամառը: Եստ աւելի դժուար է որոշել նրա մարզպան նշանակուելու տարին: Դատելով Փարպեցու պատմութիւնից՝ պէտք է ենթադրել, որ Հայաստանի մարզպան Անդեկանը արքունիք է կանչուած պաշտօնը փոխանցելու համար, եւ ինքն էլ տեղում խորհուրդ է տալիս Վահանի թեկնածութիւնը<sup>31</sup>: Մարզպանական ծառայութեան ժամկէտները արքունեաց պրոտոկոլում յստակ օրինաչափութեան չեն ենթարկուել, ուստի եւ մեզ հնարաւոր չեղաւ աւելի կոնկրետ տե-

ղեկութիւն հաւաքել ոչ այս մասին, ոչ էլ Անդեկանի անձի մասին: Ծիշտ է, Անդեկանը Վաղարշին ուղղուած խօսքում նշում է, որ օտարազգի մարզպանին Հայաստանում երկու-երեք տարի է հարկաւոր, հազիւ ճանաչելու համար «զիրս աշխարհին, զդիւրն եւ զդժուարն, ապա զմարդիկ աշխարհին, զլաւսն եւ զվատսն...»<sup>32</sup>, ինչից էլ կարելի է եզրակացնել, որ նա առնուազն այդքան ժամանակ էլ կեցել է երկրում, Վահանին ոչ միայն այդպէս լաւ ճանաչել կարողանալու, այլեւ արքայից արքայի առաջ նրան մարզպան կարգելու խորհուրդը տալու համար: Սակայն սա զուտ տրամաբանական ենթադրութիւն է եւ դեռեւս փաստարկներով հաստատուած չէ: Մենք այսպիսով այն առայժմ կը գետեղենք աւանդական հաշուարկի (ըստ որի Վահանը մարզպանութեան հրովարտակը ստացել է Տիզբոն մեկնելուց մէկ տարի անց)<sup>33</sup>, այսինքն՝ 485-ի վերջ եւ 486-ի սկզբի (կամ ամառուայ) եւ 488-ի միջեւ՝ վերջին ժամկէտ ընդունելով Վաղարշի մահը<sup>34</sup>:

Սակայն Փարպեցու թղթում կան մի քանի տեղեկութիւններ եւս, որոնք օգնում են աւելի յստակեցնել Կաթողիկէի վերանորոգման եւ Վահանի մարզպանութեան սկզբի տարեթուային հաշուարկները: Այսպէս, նամակի հէնց սկզբում հեղինակը պատմում է իր կեանքի մանրամասները՝ մինչեւ Վահանի նրան գտնելը եւ իր ընտանիքին յանձնելը. «Տարեալ զիս ըստ վարդապետաց իմոց հրամանի ի Հոռոմս՝ ժամանակեցի անդ ամս. եւ եկեալ անտի կեցի առ Կամսարականսդ յամենայն ամբոխսն մինչեւ յամս նուաճման ձերոյ: Եւ զհետ այնորիկ, որպէս թէ ձանձրացեալ յաշխատութենէ շփոթիցն՝ կամեցայ պարապել աղաւթից եւ հանգչել: Եւ երթեալ ի

27 Փարպեցի, Պատմութիւն, § 94  
 28 Ըստ Չամչեանի՝ գետը վարարել էր գարնան եղանակի պատճառով. ԱԶ. աշխ., էջ 207:  
 29 Նոյն տեղում  
 30 Տե՛ս Մ. Օրմանեան, Ազգապատում, § 320. Տեր-Մկրտչեան, ԱԶ. աշխ., էջ 175:  
 31 Փարպեցի, Պատմութիւն, § 98

32 Նոյն տեղում  
 33 Մ. Օրմանեան, Ազգապատում, § 320  
 34 Տեր-Մկրտչեան, ԱԶ. աշխ., էջ 181

Սիւնիս՝ կեցի անդ ամս երկուս... Եւ դու յայց ելեալ խնդրել զիս, եւ գտեալ յաշխարհին յայնմ՝ ածէր ի տուն...»<sup>35</sup>:

Այսպիսով, Փարպեցին գտնուել է Կամսարականների մօտ ապստամբութեան ողջ շրջանում, մինչեւ Վահանի Աուաճուելու, այսինքն՝ Տիզբոն մեկնելը եւ Պարսկական կայսրութեան մէջ ի ծառայութիւն վերադառնալը<sup>36</sup>, ուրեմն՝ մինչեւ 484-ի վերջ կամ 485-ի գարուն-ամառը: Այնուհետեւ, գնալով Սիւնիք՝ նա մնացել է այնտեղ եւս երկու տարի՝ անցկացնելով, ըստ իր խօսքերի, ամենաքիչը երկու ձմեռ կամ երկու ամառ: Այսինքն՝ Վահանը նրան գտել եւ բերել է իր տուն ոչ շուտ քան 486-ի վերջին կամ 487-ի գարնան-ամառը: Յայտնի չէ, թէ որքան է Ղազարը մնացել Մամիկո-

նեանների ընտանիքում մինչեւ Վաղարշապատ տեղափոխուելը: Յամենայն դէպս, նրան հոգաբարձութեան շնորհումը տեղի է ունեցել այս թուականներից յետոյ, ինչն էլ նշանակում է, որ տաճարի վերակառուցման աշխատանքների սկիզբը, այսինքն՝ հիմնարկների արարողութիւնը նոյնպէս տեղի է ունեցել 486/487-ից յետոյ, իսկ ամենայն հաւանականութեամբ՝ 487-ի գարնանը կամ ամառը, քանի որ, ինչպէս ընդունուած էր հնում շինարարական գործերը, յատկապէս՝ տաճարների կառուցումը սովորաբար սկսւում էր տարուայ այս եղանակներին: Ըստ այսմ՝ կարելի է եւ ենթադրել, որ Վահանը մարզպան է նշանակուել նոյնպէս 486-ի վերջ - 487-ի սկիզբ ժամանակային սահմաններում:

35 ՔԱՃԱԿԱՆ ԲՐԱՏ. § 22-24, Մատենագիրք Հայոց, Բ հտ., Անթիլիաս-Լիբանան, 2003  
 36 «Նուաճումն» բառը Ռ. Թոմսոնը թարգմանել է որպէս «խոռվութիւն, խոտորումն» (eclipse) որպէս եզրակացնելով, որ Փարպեցին Կամսարականների մօտ է մնացել մինչեւ Վահանի ապստամբութեան սկիզբը, իսկ ապստամբութեան ընթացքում գտնուել է Սիւնիքում: Այստեղից էլ՝ երկու տարուայ ժամանակագրական անճշտութիւնը (Thomson, ԱԶ. աշխ. էջ 6 եւ 250, ծմթ. 9): Իւզբաշեանը այս ենթատեքստում մայրնարում է մեկնաբանել՝ «հաշտութիւն, համաձայնութիւն» (Youzbaşyan, L'amertume...): Սակայն դատելով Փարպեցու մայրոք շարադրանքներից, մանաւանդ՝ Վաղարշի մօտ խորհրդի հաւաքուած մեծամեծների դրուագից («Երթ ի Հայս, եւ որ ինչ օրինակաւ եւ է՝ ամենայն քաղցրութեամբ եւ սիրով ըստ կամացն Վահանայ եւ Արուս ընկերակցացն՝ Աուաճեալ գորեարն եւ յԱրեաց ի ծառայութիւն ա՛ծ», § 88)՝ այստեղ «նուաճում» բառն այստեղ աներկբայօրէն հպատակուելու, հնազանդուելու իմաստն ունի, որում Մամիկոնեանի համար Աուաստացուցիչ ոչինչ չկայ, ինչպէս կարծում է Իւզբաշեանը, քանի որ արքայից արքային հպատակութեան վերադառնալու համար Վահանը իր պայմաններն է թելադրել, որոնք էլ ընդունուել են: